

ბანკების, როგორც ფინანსური ინფორმაციის მომწოდებლების როლი ეკონომიკის რეგულირებაში

საბაზრო ეკონომიკის პირობებში, ბანკებში რისკების მართვის შესახებ ინფორმაციის მოპოვება და მათი ანალიზი არის ფინანსური ანალიტიკოსების და საბანკო ზედამხედველობის ორგანოების მთავარი ამოცანა. ბანკის უმაღლესი მმართველობითი ორგანოსთვის, ფინანსური ანალიტიკოსებისთვის და საბანკო ზედამხედველობის ორგანოებისთვის, ვინც მართავს ქვეყნის ფულად-საკრედიტო პოლიტიკას, ბანკების ფინანსური ანგარიშგების ანალიტიკური შესწავლა აძლევს ინფორმაციას როგორც მთლიანად საბანკო სექტორზე, ასევე, ნათლად ასახავს ბაზრის ტენდენციებს და ურთიერთობებს, რაც უფრო მნიშვნელოვანია საბაზრო ეკონომიკის პირობებში.

სექტორული ანალიზი მნიშვნელოვანია იმით, რომ საშუალებას იძლევა დადგინდეს ნორმატიული მაჩვენებლები როგორც მთელი საბანკო სექტორისთვის, ასევე სექტორის შიგნით ერთგვაროვანი ჯგუფებისთვის. მოსალოდნელი ტენდენციებისგან და ურთიერთობებისგან გადახრამ შეიძლება გამოიწვიოს არა მხოლოდ ცალკეული ბანკების რისკი, არამედ ფინანსური ურთიერთობების შეცვლა მთლიანად საბანკო სისტემაში.

საბანკო სექტორის სტატისტიკის შესწავლით, ანალიტიკოსს ექმნება წარმოდგენა როგორც უშუალოდ ბანკში მიმდინარე პროცესებზე, ასევე იმაზეც, თუ რა ზეგავლენის მოხდენა შეუძლია ბანკს მასთან დაკავშირებული ეკონომიკური პროცესის მონაწილეებზე, ან ეკონომიკის რომელიმე დარგზე. ეკონომიკურ პოლიტიკას შეუძლია განსაზღვროს როგორც ინფორმაციაზე მისაწვდომობა, ასევე იმ ინფორმაციის მოთხოვნილება, რომელიც აუცილებელია ეკონომიკური სტაბილურობის მისაღწევად.

რამდენადაც ბანკები გვევლინებიან ქვეყნის შიდა და საერთაშორისო ფინანსური სისტემის ნაწილად, ისინი მნიშვნელოვან როლს თამაშობენ ნაციონალურ ეკონომიკაში. სწორედ ამიტომ, საბანკო ინფორმაციის სტატისტიკა გვევლინება ქვეყნის ეკონომიკის ინდიკატორად.

ფინანსურ ინოვაციებს, როგორც წესი, მიჰყვართ ეკონომიკური მაჩვენებლების შეცვლისკენ, რაც ცვლის ფინანსური მაჩვენებლების დინამიკასაც. ამ პროცესებმა შესაძლოა მიგვიყვანოს იმ სიტუაციამდე, როდესაც მაკროეკონომიკური მოდელი ვეღარ ასახავს არსებულ რეალობას.

მაია ალადაშვილი

სოციალურ მეცნიერებათა
დოქტორი ეკონომიკაში.

ი. გოგებაშვილის სახელობის თელავის
სახელმწიფო უნივერსიტეტი.

სოციალურ მეცნიერებათა, ბიზნესის
და სამართლის სკოლა.
მოწვეული დოქტორი.

საბანკო სისტემის საქმიანობის გავლენა ფულად-საკრედიტო სტატისტიკაზე, მაგალითად, ფულის მასის მაჩვენებელი, ან შიდა კერძო სექტორზე გაცემული კრედიტების ოდენობა, მნიშვნელოვანია როგორც ბანკის, ასევე ფულად-საკრედიტო სისტემის პოლიტიკის შემუშავებაში.

ბანკების შესწავლა და მათი ანალიზი შესაძლოა ემსახურობდეს სტრუქტურირების მექანიზმს, რომლის დახმარებითაც ფულად-საკრედიტო სისტემის მარეგულირებელი ორგანოები ადგენენ როგორც დაფინანსების და დაკრედიტების ოდენობას, ასევე აფასებენ სხვა პროცესებსაც, რომელთაც მნიშვნელოვანი როლი აკისრიათ ეროვნული ბანკის ფულად-საკრედიტო პოლიტიკის განხორციელებაში.

სტრუქტურული მდგომარეობის უპირატესობა ბანკების შეფასებაში მდგომარეობს იმაში, რომ საბანკო სექტორის საქმიანობა განიხილება სისტემატურად და მისი სტატისტიკა გამოსაყენებელი და აუცილებელი ხდება ქვეყნის მაკროეკონომიკური ფულად-საკრედიტო ანალიზისთვის. სწორედ აქედან გამომდინარე, საბანკო ზედამხედველობის ორგანოს, გარდა წმინდა ზედამხედველობის ფუნქციისა, გააჩნია ფულად-საკრედიტო პოლიტიკის წარმმართველ ორგანოთა დამხმარე ფუნქცია, რომელთა გადაწყვეტილებები მნიშვნელოვნადაა დამოკიდებული საბანკო სექტორში მიმდინარე პროცესებზე.

კონკურენტულ და არამყარ საბაზრო სივრცეში ბანკის შეფასება კომპლექსური პროცესია.

ბანკის ფინანსური მდგომარეობის და მისი მდგომარეობის შემოწმება კონცენტრირდება კონკრეტული ასპექტების შეფასებაზე, როგორიცაა მართვა და კონტროლი, რისკების სახეები და მათი მართვა, ფინანსური ანგარიშგება, ბანკის საკრედიტო პორტფელის სტრუქტურა და ხარისხი, პოლიტიკა და პროცედურები, ადამიანური რესურსები და

საინფორმაციო პოტენციალი.

იმისათვის, რომ გააანალიზოს ბანკის კონკრეტული მაჩვენებლები, ასევე შესაფასოს მომავალი პოტენციალი, გამოავლინოს მნიშვნელოვანი პრობლემები და დასახოს ეფექტიანი და რეალიზებადი მოქმედების გეგმები, ანალიტიკოსმა კარგად უნდა შეისწავლოს ბაზარი და ის ეკონომიკური პირობები, რომელშიც მოქმედებს ბანკი.

სუსტი საკანონმდებლო ბაზა და სამართლებრივი სისტემა, ასევე ფინანსური კონტრაქტების შესრულების სირთულე ან მაკროეკონომიკური არასტაბილურობა, აუცილებლად იწვევს საკრედიტო რისკის ზრდას და ართულებს ამ რისკის მართვას.

არასტაბილური ფინანსური სისტემის ძირითად მიზეზად გვევლინება არასტაბილური მაკროეკონომიკური გარემო არათანაბარი ეკონომიკური მაჩვენებლებით, სავალუტო და ასევე, ფასიანი ქაღალდების კურსის მკვეთრი ცვლილებებით. ასეთი გარემო მნიშვნელოვნად ართულებს საბანკო აქტივების და ფინანსური რისკების ზუსტ და რეალურ შეფასებას.

ქვეყნის საკანონმდებლო ბაზა და სასამართლო სისტემა უშუალოდ მოქმედებს ბანკის ფუნქციონირების მრავალ ასპექტზე, როგორცაა მაგალითად, კონტრაქტების პირობების შესრულების განხორციელება, ან დაგირავებული ქონების საკუთრებაში გადაცემა, ან გადახდელუუნარო მსესხებლების ლიკვიდაცია. ან-

გარიშგების გამჭვირვალობა ქმნის საფუძველს ეფექტიანი საქმიანი გარემოსთვის როგორც ბანკებისთვის, ასევე სხვა ფინანსური დაწესებულებებისთვის და მათი კლიენტებისთვის.

როგორც უკვე აღვნიშნეთ, ქვეყნის ნორმატიულ-საკანონმდებლო გარემო და რეგულირების სისტემა, ასევე ბაზარი, განსაზღვრავს თამაშის წესებს ფინანსურ სისტემაში. სწორედ აქედან გამომდინარე, ვიდრე ბანკის შეფასებას მოახდენდეს, ანალიტიკოსმა ზუსტად უნდა იცოდეს მოქმედი კანონმდებლობა და რეგულირების ნორმები, რათა განსაზღვროს ამ რეგულირების ნორმების შესრულების ხარისხი და კანონთან შესაბამისობა, ასევე, ნორმატივების და კანონების ცოდნა ხელს შეუწყობს კრიტიკულ სიტუაციაში აუცილებელი და შესაბამისი გადაწყვეტილებების მიღების სისწრაფეს.

ამრიგად, საბანკო სფეროს ფინანსური ინფორმაციის უტყუარობა და მისი საფუძვლიანი ანალიზი ძალზედ მნიშვნელოვანია ქვეყნის ეკონომიკის განვითარებისათვის, მითუმეტეს, თუ გავითვალისწინებთ, რომ ცენტრალური ბანკის მთავარი ფუნქციები, ეს არის ქვეყნის ფულად-საკრედიტო სისტემის რეგულირება და მისი სტაბილურობის შენარჩუნება, ასევე საბანკო სისტემის ზედამხედველობა და საანგარიშსწორებო სისტემის კონტროლი, რომელთაც მნიშვნელოვანი გავლენის მოხდენა შეუძლიათ ქვეყნის ეკონომიკურ პოლიტიკაზე.

ბამოყენებული ლიტერატურა

Гюринг Хенни Ван, Братанович Соня Брайович. Анализ банковских рисков. Система оценки корпоративного управления и управления финансовым риском. Москва: издательство «Весь Мир». 2007.

РОЛЬ БАНКОВ КАК ПОСТАВЩИКОВ ФИНАНСОВОЙ ИНФОРМАЦИИ В РЕГУЛИРОВАНИИ ЭКОНОМИКИ

МАИЯ АЛАДАШВИЛИ - доктор социальных наук

Сбор в банках информации об управления риском и ее анализ являются ключевыми задачами органов надзора и финансовых аналитиков. Секторный анализ важен тем, что он позволяет устанавливать нормативные показатели как для всего сектора, так и для однородных групп в рамках сектора. Воздействие банковской деятельности на кредитно-денежную статистику, например на показатели денежной массы и предоставления кредита внутреннему частному сектору, также является предметом внимания при выработке политики.

ROLE OF BANKS AS PROVIDERS OF FINANCIAL INFORMATION IN THE REGULATION OF THE ECONOMY

MAYA ALADASHVILI - doctor of social sciences

At article the role of banking information in the management of economy for the important decision making is discussed. Sectoral analysis is important because it allows us to establish normative parameters for the banking sector as a whole, as well as for homogeneous groups within the sector. The influence of the banking system to the monetary - credit statistics, for example, money supply figure, or the volume credits provided to internal private sector, is important both for a bank, and monetary - credit system policy development.